

2021
AÑA DI RECUPERACION

2021

ISLA(●)NLINE

Dialuna 19 April 2021

Email: IslaOnline@gobierno.aw Tel: 528-4900

2021

AÑA DI RECUPERACION

ISLA ONLINE

NOTICIA DI GOBIERNO



GOBIERNO DI ARUBA



Prome Minister Evelyn Wever-Croes:
Cumpliendo cu e vision pa tur ciudadano tin un hogar
GABINETE WEVER - CROES REALISANDO
DIFERENTE PROYECTO DI VIVIENDA A
TRAVES DI FCCA



Prome Minister sra. Evelyn Wever - Croes a wordo invita door di FCCA pa mira 7 diferente proyecto di vivienda den diferente distrito rond Aruba. Minister di Labor, señor Glenbert Croes, tambe tawata presente na e recorrido aki. Algun di e proyectonan ya a finalisa, por ehempel na Tanki Leendert y otronan ta den ehecucion manera na Rooi Bosal.

E vision di Gabinete Wever – Croes, poniendo e ser humano central, ta inclui yuda tur ciudadano yega na nan cas. Y a traves di e proyectonan aki por bisa cu ta riba e bon caminda. A bishita e proyectonan na Wegkustbatterij (12 cas), Kiviti (71 cas), Isaac Wagemakerstraat (8 cas), Rooi Bosal (46 cas), Hato (8 cas), Tanki Leendert (36 cas).

Ta importante pa mira con e proyectonan di FCCA ta wordo ricibi tambe den comunidad. Durante di e recorrido Prome Minister tabatin e oportunidad pa combersa cu algun habitante cu ta hopi contento cu nan tin nan cas. Gobierno tambe ta contento cu a traves di e sosten cu ta duna FCCA, por logra esaki.

Pa conclui, Prome Minister a expresa cu apesar cu e Pandemia a stroba hopi cos, tin e speransa cu pronto lo por continua cu e trabounan. Pa esaki mester cooperacion di cada ciudadano di Pais Aruba, pa hunto logra cu tur hende por tin dak riba nan cabaes.

Continuacion GABINETE WEVER-CROES REALISANDO DIFERENTE....





WEB y ELMAR ta anuncia cu lo por surgi interrupcionnan cortico DURANTE APRIL Y MEI LO INTEGRA UNIDADNAN DI CORIENTE RIBA 'IGMS' Y IMPLEMENTA 'ILS'



Operacion di e planta di energia di WEB Aruba te ainda pa gran parti ta rekeri monitoreo y ahuste continuo den forma manual door di operadornan. Pronto lo trece cambio den esaki cu un sistema cu yama 'Intelligent Generation Management System' (IGMS). Durante e proximo 4 simannan, WEB lo integra tur su unidadnan di produccion di coriente y energia den e sistema IGMS. Di e forma aki lo regula e suministro di coriente automaticamente. Durante e proceso, clientenan lo por experencia interrupcion di coriente corto cu un average entre

15 pa 30 minuut. Ta tuma tur precaucion debido y ta alinea pa minimalisa e interrupcion aki. Hunto cu IGMS lo implementa e sistema Intelligent Load Shedding (ILS) den cooperacion cu ELMAR. E 'load shedding' ta pa evita cualke interrupcion grandi di coriente. Asina clientenan den futuro lo por ripara interrupcion na un escala menos grandi y di poco duracion. Lo mantene pueblo semanalmente informa di e proceso di implementacion via pagina di Facebook di WEB y di ELMAR.

Continuacion DURANTE APRIL Y MEI LO INTEGRA UNIDADNAN


WEB Aruba ta genera energia cu un combinacion di ekipo di boiler, turbinanan acopla na generadornan, motornan RECIP, parkenan solar y molinanan di biento. Ademas WEB ta almacena energia na un escala chikito di fuertenan sostenibel manera solo y biento pero tambe di energia fosil. Te awor, operadornan di WEB ta maneha e planta manualmente. Esey ta rekeri atencion constante, pero tambe habilidad casi sobrehumano pa dicidi rapidamente cua ekipo ta lanta na cua momento durante un desbalance entre demanda y suministro di coriente. Cu IGMS, WEB lo por mantene e suministro y calidad di coriente pa ELMAR mas stabil y den futuro lo por integra mas unidad pa sostene e operadornan. Tambe lo por actua mas liher ora di interrupcion y of desbalansa den e demanda.

Aunke no ta premira interrupcion, ta pidi comunidad di Aruba comprension en caso cu surgi interrupcion di coriente den e simannan venidero. Ta enfatisa cu lo haci tur posibel pa minimalisa e interrupcionnan aki. Di antemano ta pidi disculpa pa inconveniencia cu por surgi, debi na e trabounan necesario di integracion. Ta recomenda clientenan pa sigui e updatenan via e pagina di Facebook di WEB Aruba y di ELMAR pa keda na altura di e proceso y di posibel interrupcionnan.

IGMS y ILS ta forma parti di e combinacion di proyecto y inversionnan cu WEB a bin ta haci pa por ofrece awa y coriente na un manera confiabel, pagabel y sostenibel. Implementacion di IGMS ta un logro mas den e esfuersonan di WEB pa cumpli cu su vision di ta 'Greener, Cleaner and Fuel Oil Free'. Introduccion di e sistemanan IGMS/ILS mester a tuma lugar na 2020. E proyecto sinembargo a sufri restraso pa motibo di upgrading di e sistema na otro proyecto similar y pa motibo di e pandemia den aña 2020. Pa ehecucion di e proyecto



WEB y ELMAR a cera un convenio cu un definicion cla di e rol y responsabilidadnan di cada compania pa implementa e sistemanan, cu ta asina importante pa suministro di coriente pa nos isla.





BISHITA DI CORTESIA DI MINISTER CROES DI CORSO SERCA MINISTER MADURO

Siman pasa diabierna Minister Xiomara Maduro di Cultura a ricibi un bishita di cortesía di su homologo Minister Steven Croes encarga cu Enseñansa, Ciencia, Cultura y Deporte di Pais Corsou. Tabata durante e encuentro di Vierlandenoverleg di Ministernan di Enseñansa y Cultura di Reino, cu e mandatarionan por a sera conoci cu otro virtualmente y awor a haya un momento pa por a combersa personalmente riba e topico di cultura.

Durante e encuentro a resalta e atencion cu cada Minister ta dedica na brinda atencion y honra esnan cu ta carga e cultura di nos Paisnan. Na final di e encuentro ameno, Minister Maduro a regala Minister Croes e buki BaluArte, cu ta e prome documentacion na Papiamentu di e pilarnan cultural di Aruba.



MINISTER XIOMARA MADURO ATENDE E REUNION DI IMF WESTERN HEMISPHERE CU MINISTERNAN DI FINANSA Y PRESIDENTENAN DI BANCO CENTRAL DI CARIBE

Aruba ta conta cu e yudansa necesario pa por recupera su economia

Den cuadro di IMF Spring Meetings, diabierna ultimo, Minister Maduro a atende e reunion di IMF Western Hemisphere cu Ministernan di Finansa y Presidentenan di Banco Central di Caribe. Pa Reino Hulandes, Aruba y Corsou su Ministernan di Finansa y Presidentenan di Banco Central tabata presente den e reunion virtual aki di IMF. Den e reunion aki presidi pa e Director di IMF Western Hemisphere sr. Alejandro Werner, a duna un update di e miras global y regional, a brinda informacion riba prospectonan di vacunacion, a papia riba ideanan innovativo pa yuda paisnan den Caribe y a busca pa sa con IMF lo por yuda e Paisnan den nos region.

Paisnan den Caribe hopi afecta pa COVID19



Mayoria Pais den Caribe ta biba di turismo y e crisis di COVID19 ta afecta e economia di e islanan grandemente. Sin yudansa rapido hopi Pais no lo por recupera. Door di e medidanan pa proteha salud di hende, hopi Pais mester a lockdown y esaki ta trece problema grandi cune. Sigur pa Paisnan den Caribe cu ta biba di turismo, e crisis aki a dal hopi duro y nan a perde entrada grandemente. Pa awor nan economia no lo por produci e entrada necesario y pesey nan ta destina pa por haya yudansa externo pa por cubri nan necesidad financiero.

Programa di vacuna ta importante pa recupera

Pa e recuperacion economico un programa di vacuna tambe ta hopi importante. Mas hende wordo vacuna y protegi, mas lihe por kita e medidanan pa proteha salud di hende cu ta afecta e economia di e Paisnan. Hopi Pais den Caribe mester a bay den lockdown pa asina por tene casonan di COVID19 abou, pero esaki ta afecta comercio y economia di e Paisnan aki grandemente. Mester remarca cu no ta tur Pais den Caribe ainda ta conta cu vacuna y esaki ta haci cu nan mester keda aplica medida pa cuida nan salud cu ta afecta comercio y di e manera aki e recuperacion economico lo tarda mas tempo.

Aruba ta conta cu e yudansa necesario pa por recupera

Na Aruba nos ta conta cu yudansa necesario di Reino Hulandes pa nos por recupera. Desde mei 2020, Aruba ta conta cu fianseman di Reino como sosten di likidez pa por cubri e necesidad financiero cu Aruba su economia na e momentonan aki no por produci. Aruba ta hayando fondo tambe presta pa asina por yuda mantene cupo di trabou y hunto cune comercio na nos Pais. Banda di esaki Aruba ta conta tambe cu yudansa di Hulanda pa vacuna. Aruba ta hayando suficiente vacuna y a set up un programa masha eficiente cu ta percura pa un



gran parti di nos poblacion por wordo vacuna y protegi. Esaki ta yuda Aruba su posicion como Pais den Caribe cu ta biba di turismo y ta haci cu nos recuperacion economico por bay mas lihe.


MINISTER XIOMARA MADURO A SERA CONOCI CU DIRECTOR NOBO DI GREMIO COMERCIAL ATIA

Peticion pa comercio apoya programa di vacunacion pa economia recupera mas lihe

Diabierna Minister Maduro a reuni cu gremio comercial ATIA pa sera conoci cu sr. Herrick Henriquez kende ta e Director nobo pa ATIA. Presente tambe tabata e Presidente di ATIA sr. Frank Snijders y sra. Tisa LaSorte kende ta miembro di e board di ATIA.

Durante e reunion a toca diferente tema, entre nan, e importancia pa comercio propaganda y incentiva vacuna pa asina nos por recupera nos economia mas lihe. E ta importante pa mas hopi hende haya vacuna y akinan ta na unda cu mester por conta cu e cooperacion di e doño di trabou tambe pa yuda apoya y incentiva nan trahadornan pa bay vacuna. E apoyo di comercio lo yuda pa Aruba su economia recupera mas lihe.

Un otro punto tabata e reforma fiscal y aki e mandatario a splica cu awor den cuadro di e ehecucion di e Landspakket, Gobierno ta haciendo calculacionnan nobo pa asina despues di eleccion por tuma e decisionnan necesario. Minister Maduro a brinda informacion tambe riba e sosten financiero cu Gobierno ta keda brinda den aña 2021 den forma di Sosten Financiero pa kwartaal y Subsidio di Salario na comercio pa por surpasa e crisis. E mandatario a splica cu den Presupuesto 2021 e sosten financiero ta presupuesta y ta wardando pa Parlamento yama e reunion publico pa asina por aproba pa Gobierno keda brinda yudansa na comercio.





SOSTEN FINANCIERO

NA EMPRESA CHIKITO Y MEDIANO

Gobierno di Aruba ta ofrece yudansa financiero den forma di Sosten Financiero pa Empresa Chikito y Mediano cu un suma di 4000 florin pa kwartaal.

Tur empresa chikito y mediano cu tin 1 te cu 50 trahado cu a ricibi notificacion di SVB, por aplica pa e Sosten Financiero pa Empresa Chikito y Mediano.

POR APLICA

Via e portal di MiSVB desde

15 di april 2021 te cu 19 di april 2021.

Pago ta wordo haci entrante 16 di april 2021.



PA PREGUNTA RIBA SOSTEN FINANCIERO

Por tuma contacto cu MKB Helpdesk via

helpdeskmkb@svbaruba.org of subi

www.svbaruba.org



XiomaraMaduro.com



Minister Andin Bikker orguyoso cu: A FINALISA TRABOU DI MANTENCION RIBA EDIFICIO DI CORTE

E proyecto di mantencion di edificio di corte situa den John G. Emanstraat a yega su final. A tene un ceremonia cortico den forma di firmamento di un proces-verbaal, caminda cu a entrega e edificio.

Awo e siguiente paso ta pa sigui cu e trabounan di mantencion, awo cu e edificio mes ta drecha.

E proyecto aki tabata exitoso no solamente pa e mantencion, sino e manera cu e trabaonan a tuma luga, di tal indole cu durante di e mantencion por a efectua trabaonan den corte, mientras cu e edificio tabata kedando cla. A haya cooperacion di parti di e contratista.

Minister di Husticia, Siguridad y Integracion, mr. Andin Bikker tin gran aprecio pa e trabou duro cu a tuma luga riba e edificio awo den tempo di crisis, cu nan no mester a huur un edificio adicional mientras cu e renobacion/mantencion a tuma luga.

Siendo un persona cu a traha hopi aña como abogado renombra riba nos isla, e edificio di Corte di Husticia ta masha cerca di su curason. E no a basila ningun momento despues di realisa cu for di aña 2013 cu a entrega e edificio, no a percura pa mantencion di dicho edificio, cu pa colmo ta historico tambe. Despues di 8 aña awo e edificio ta den su gloria bek!

Personal di Corte di Prome Instancia ta sumamente contento y satisfecho cu e edificio y ta gradici e contratista cu a haci un tremendo trabou. "Nos lo zorg como pais Aruba pa sigui esaki", e mandatario a bisa.

Tambe a inform'e cu e edificio aki tin un garantia te 2027. E ta gradici na tur cu a yuda realisa e proyecto aki, specialmente na Monumentenzorg cu a hunga un rol crucial den e trabounan aki.



PERIODISTA PA UN DIA

BAN
STIMULA
NOS
MUCHANAN
PA STUDIA
PERIODISMO

Bo kier ta **periodista pa un dia?** 50 di 10.000 mucha na Aruba lo haya e oportunidad pa haci nos **Minister-President pregunta** durante e prome conferencia di prensa hubenil y sinti e **sensacion di fa un periodista!**

Si esaki ta algo cu bo ta haya great, skibi akibou cua ta e 3 preguntanan cu **abo lo kier puntra sra. Evelyn Wever-Croes.**

E muchanan di scol basico cu e pregunta nan mas interesante ta wordo invita pa haci nan pregunta na Minister-President en persona

Scol:

Klas:

Number:

Edad:

pregunta
1

pregunta
2

pregunta
3


Forma parti di nos conferencia di prensa hubenil
Bishita **specialprojectaruba1919**



MINISTER CHRIS ROMERO A BISHITA E “HOF’I AMISTAD” DI COLEGIO HILARIO ANGELA

Recientemente e Titular di e Cartera di Transporte, Comunicacion y Sector Primario, sr. Chris Romero, a bishita Colegio Hilario Angela pa asina aprecia personalmente e hofu cu e muchanan y docentenan a traha na e scol.

Tabata un mainta sumamente ameno y gratificante, tumando na cuenta cu e proyecto “Hof’i Amistad” ta uno cu Minister Romero personalmente a desaroya y impulsa for di 2019 caba y awendia mas y mas scol ta adoptando esaki. Pero tambe tabata un rato hopi emocional pa Minister Chris Romero pasobra Colegio Hilario Angela ta e scol basico cu e a atende durante su infancia.



“Awe mi ta den mi barrio di Weg Fontein, na Colegio Hilario Angela, pa mira personalmente e bunita hofu cu a keda desaroya



na e scol aki. Cu apoyo y experticio di Santa Rosa/DLVV, Colegio Hilario Angela a logra traha un Hof’i Amistad hopi bunita, cu e meta principal pa inculca e amor pa nos mama tera den e muchanan for di hopi trempan. Como mayor y docente mi mes, mi ta consciente di e impacto cu proyectonan di e indole aki ta haci serca e muchanan mas chikito y cu e pensamiento ey nos a cuminsa cu e proyecto escolar cu awendia nos conoce como Hof’i Amistad”, Minister Chris Romero a duna di conoce durante su bishita na Colegio Hilario Angela.

Minister Plenipotenciario Besaril: NOS A LOGRA MAS GUIA PA NOS STUDIANTENAN NA HULANDA PA ASINA TA MAS EXITOSO DEN NAN ESTUDIO



Minister Plenipotenciario Guillfred Besaril a elabora riba e diferente reunion cu su persona y staf di Arubahuis a hiba cu diferente hogeschoolnan, specialmente cu e hogeschoolnan den Randstad, manera Amsterdam, Rotterdam, Den Haag y Utrecht. Tambe e mandatario a bisa di a reuni cu tres universidad, di cual dos a resulta sumamente fructifero y uno ta pendiente. Esunnan cu a resulta fructifero ta Vrije Universiteit di Amsterdam y Universidad di Utrecht. 'E hogeschool y universidadnan tin programanan cu asina e hobennan di Aruba yega y manera cu nan cuminsa y nan sinti cu ainda nan falta un poco di e Hulandes, nan por cuminsa na haya guia di biaha di parti di e scol. Esaki ta un preparacion den cual ta caba di duna nan e hermentnan nesesario pa nan por ta exitoso den nan escohencia den nan estudio. Pasobra Hulandes ta keda un idioma cu specialmente pa nos studiantenan ta sumamente

dificil. E ta un idioma cu nos no ta practica masha na cas,' segun minister Besaril.

Den cuadro di e mesun combersacionnan aki, minister Besaril a mostra riba De Haagse Hogeschool cu ta un instituto cu ta un "trendsetter" pa loke ta convenio ariba guia di nos studiantenan. Minister Besaril: 'Ora cu nan identifica cu e estudiante por bien ta confortabel den e rumbo di estudio cu ela scohe, pero cu e por desaroya su mes mas mihor den e version Ingles di e estudio. Por ehempel enbes di haci bedrijfskunde e ta haci International Business. E ora ey e ta cambia di estudio sin cu e ta perde su "studiepunten". Pues e ta dji cu cambia di un idioma pa otro y ta continua su estudio. Atraves di e tipo di acuerdonan aki, pero tambe e tipo di combersacionnan cu nos a hiba cu e hogeschoolnan nos a mira tambe cu tin un cifra basta prometedora di hobennan cu ta terminando nan estudio den e version Ingles, al contrario di e continua esaki na Hulandes.'

Segun e mandatario esaki ta un oportunidad cu den futuro lo mester sigi traha riba dje pa di e mane-ra aki por salvaguardia y garantiza cu ora e grupo di hobennan Arubiano subi avion y bai Hulanda nan tin un mihor oportunidad di termina nan estudio. 'No solamente pa ora nan bin bek, pero real-mente pa nan mes. Na dado momento ora bo scohe pa un estudio, anto bo no logra termina, pero si bo ta logra ta termina cu un debe. Y esey ta loke nos mester purba di evita pa cualkier profesional cu tin e debe, e mester por haya un bon trabao pa por cumpli bek y asina aki e bira algo circular, den cual Gobierno di Aruba e dunabo un man; DUO a dunabo un man y abo ta paga bo debe bek y asina e logra cu e ta un placa circular; bo ta duna un otro hende pa medio di e cumpli cu pago di bo debe di estudio e oportunidad pa e bai y studia y bira un profesional,' segun declaracion di sr. Besaril.

E analisis di Minister Plenipotenciario Guillfred Besaril riba e trabao cu a bin ta wordo haci e ultimo tempo ta pa yuda y duna un sosten mas amplio na nos hobennan pa asina aki nan ta real-mente exitoso na Hulanda. Basta trabao cu a tuma lugar durante di e pandemia di Covid 19 cu e haci cu awe Arubahuis ta hopi mas pro activo pa loke ta trata e hobennan cu dentro di algun luna lo yega Hulanda.

REPRESENTANTENAN DI HULANDA A KEDA SATISFECHO CU E PROSESO DI VACUNACION NA ARUBA



Diabierna dia 16 di april, Aruba a ricibi bishita di un delegacio di Hulanda esta e gezant vaccinatie y e beveiligingscoordinator cu a bin Aruba pa tuma nota di e proseso completo di e programma di vacunacion na Aruba.

Pa Aruba por a ricibi vacuna di Hulanda, un plan completo a wordo presenta na januari 2021 y e base di e plan aki Aruba a ricibi vacuna for di Hulanda. Diabierna cu a pasa representantenan di Hulanda a yega Aruba pa verifica cu enberdad e plan presenta ta wordo implementa. Por bisa cu e representantenan di Hulanda e keda hopi satisfecho cu nan bishita na e localidad di vacunacion y cu ful e proseso logistico con eta funciona.

Na mes momento Aruba e probcha di presenta na e delegacion un otro plan di vacunacion masal, unda e meta ta pa vacuna riba 2 dia tras di otro un promedio di 10.000 ciudadano haciendo uzo di direrente localidad na mes momento.

Pa cu e plan aki, nos por informa comunidad cu Crisis Team a ricibi e autorisacion pa sigui cu tur preparacion pa haci e Vaccinathon un realidad. Dentro di e siguiente dianan comunidad lo bay ricibi mas informacion riba e 2 dianan di vacunacion masal unda comunidad lo por yega, registra y vacuna. Mester bisa cu e representantenan di Hulanda a keda impresiona cu e

effectividad y liheresa cu nos plan di vacunacion ta canando. Hulanda e bisa cu Aruba ta un ehempel pa otro lugarnan con ta ehecuta un plan di vacunacion. Un elogio grandi e ser vocifera pa cu e Aruba Health App cu ta wordo usa como plataforma pa registra e vacunacion na Aruba. Hulanda ta hopi satisfecho di e forma con minister di Salubridad Publico Dangui Oduber, Gobierno y Crisis Team e maneha e programa di vacunacion. Pabien Aruba cu e logro aki.



Aruba ta vacuna: VACUNA TA UN ACTO DI SOLIDARIDAD Y REPONSABILIDAD CONHUNTO Niun por keda atras

Desde cu COVID-19 a haci su entrada na Aruba, e meta tawata pa salba bida di nos ciudadanonan di 60 aña of mas y di esnan cu condicion di salud fragil cu tawata esnan mas afecta pa e virus.

Cu yegada di e diferente otro variantenan di e virus, rond mundo y na Aruba tambe a tuma nota cu ya no ta nos adulto mayor di 60 aña so tawata na riesgo pero tambe esnan bou 60 aña. E variante nobo conoci como e variante Britanico a sa di tuma over y ta ocasionando infeccion y ingreso den hospital di nos adultonan hoben. Esaki ta e motibo pakico awor ta di gran importancia pa nos adultonan hoben entre 18 cu 60 aña tambe proteha nan salud y tambe vacuna nan mes.

Door di vacuna bo mes, no solamente bo ta protehando bo mes, pero tambe bo ta yuda proteha un otro persona cu porta no por vacuna debi cu e ta bou 18 aña of su condicion di salud no ta permiti esaki.

Mas persona vacuna, asina nos hunto por forma un barera di proteccion rond di esnan cu no por vacuna.

Vacuna ta un acto solidaridad y reponsabilidad conhunto pa yega na e inmunidad colectivo pa caba cu COVID -19 na nos isla y por bolbe na un bida mas normal cu ta posibel.

Den e lucha contra COVID-19 ningun persona mag keda atras of sin proteccion.

No mas tristesa, ni mas morto na nos isla!

Di awe pa'dilanti Aruba ta sigui positivamente den e lucha contra COVID, hunto nos ta vence COVID-19 y niun hende lo keda atras.

Sea solidario y responsabel ta e yabi pa nos recuperacion!





UPDATE 19 April 2021

ADMITTED COVID-19 PATIENTS

ICU WARD	
TOTAL	
18	
LOCAL	12
NON-LOCAL	6

NURSING WARD	
TOTAL	
23	
LOCAL	18
NON-LOCAL	5

COVID-19 SUSPECTED

AWAITING RESULTS	IN QUARANTINE
5	0

Departamento di Salud Publico:

UPDATE 19 DI APRIL 2021

Segun resumen di awe 81 persona a recupera, a registra un total di 21 caso nobo di Covid-19, di cual 2 ta no-residente. E cantidad total di testnan ehecuta ayera na e diferente localidadnan na Aruba, entre otro laboratorio di hospital, laboratorionan priva y aeropuerto ta 460 test. 'Postivity rate' entre nos residentenan ta 37%.

Casonan activo pa awe ta 391, cantidad di fayecido relaciona cu Covid-19 ta 92

Hospital ta informa cu tin un total di 41 persona interna di cual 18 ta den Cuido Intensivo y 23 riba unidad general di covid.

  ARUBA COVID-19			
19/4/2021	TOTAL	RESIDENTE	NO-RESIDENTE
Casonan Nobo	21	19	2
Activo	391	338	53
Recupera	9862	9160	702
Positivo	10345	9589	756
Negativo	130254	-	-
Getest	141122	-	-
Getest na Airport	93695	-	-
Morto	92	91	1



2021

Tur caminda cu ta
dirigi na exito
mester pasa den
trabou duro
cu dedicacion y
determinacion
nos ta logra e
exito cu nos
propone

Feliz Siman

GABINETE WEYER-CROES

ISLA ONLINE

NOTICIA DI GOBIERNO